



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

## **Su lantioneddu de Lutzifuru de monti**

Innì me in s'incurtzadroxu chi de sa bidde de Gùspini bitit a Arbus, ddoi at una mitza de àcua fini ca sanat fintzas is malàdius, ma no a totus is oras si ddoi podit bandai.

Paris cun su soli ca si-nci ghetat a palas de su monti, ànima batiada non passat de ingunis. In cussu logu maladitu bessit dònna diri unu predi sconcau in cumpangia de su sagrestanu ca bitit unu lationeddu arrùbiu.

Medas ant biu su chi de u nau, e mi calit una guta chi de u non nau sa beridadi, e ant tentu atzìchidus mannus. Is antigus contant ca custu predi disfrassàt is scrèmpius fadendi mali fatus e guadangiàt dinai meda e ddu suterràt acanta de sa mitza.

Po custu nemus, apustis chi est calau su soli, passat acanta de sa mitza, nimancu cun su pentzamentu.

## **Sa tzitadi de Nàpoli**

Innì, me in sa tzitadi de Nàpoli ca fiat in su sartu de Gùspini, ddoi fiat una bella picioca, in cussèntzia bella che su soli. Custa picioca fiat stètia domandada a isposa de su prus arricu de sa tzitadi, ma custu picioca ca ndi stimàt un'àteru dd'iat torrau crocoriga, e dd'iat arrefudau.

Su sposu arrefudau intzandus, po mori de su chi fiat sutzèdiu iat bociu su sposu chi iat pigau cussa bona e bella massaja. Ma non sciat ita ndi fai de cussu corpus e nc'iat pentzau unu pagu.

Apustis nci-dd'iat ghetau in una càscia e dd'iat lassau pudesci, duncas, de coru malu, nci-dd'iad ghetau in sa mitza de s'àcua bella.

Apustis s'acqua de sa mitza s'est pudescia po mori de su chi nci fiat aintru de cussa càscia, est a nai su sposu bociu de su sposu refudau.

Sa genti bufendi de cuss'acqua pudescia si nd'est pigada una maladia mala e in pagu tempus funt stètius spèrdius mannus e piticus.

Intzandus, Deus arrannegau at mandau sa maledizioni a sa tzitadi e at fatu una noti de tronus, lampus e acqua (non mi nci apa essi bòfiu essi deu inni).

De sighiu est arribau su terremotu, e, su mengianu infattu non s'agatàt inni nimancu prus una domu sceti sa cresiedda ca si birit incora oi calincunu muru sciorrocau.